

## REGLUGERÐ

### um breyting á reglugerð nr. 84/1982, um starfsmannabústaði og starfsmannabúðir.

1. gr.

2. gr. 2. tl. fellur niður og aðrir töluliðir færast til sem því nemur.

2. gr.

2. gr. 6. tl. verður 2. gr. 5. tl. og orðist svo:

Heilbrigðisnefnd skal gæta þess að uppfyllt séu ákvæði laga nr. 50/1981, um hollustuhætti og heilbrigðiseftirlit, heilbrigðisreglugerðar, þessarar reglugerðar, byggingarreglugerðar og brunamála­reglugerðar og getur krafist hverra þeirra upplýsinga og viðbótar­gagna frá umsækjanda, sem hún telur þörf.

3. gr.

Reglugerð þessi, sem sett er með stöð í lögum nr. 50/1981, um hollustuhætti og heilbrigðiseftirlit öðlast gildi þegar í stað.

*Heilbrigðis- og tryggingamálaráðuneytið, 18. maí 1983.*

**Svavar Gestsson.**

*Páll Sigurðsson.*

## SAMÞYKKT

### um stjórn hreppsmála Hafnarhrepps.

I. KAFLI

#### Um skipan hreppsnefndar og verkefni hennar.

1. gr.

Hreppsnefnd Hafnarhrepps skal skipuð 7 hreppsnefndarmönnum kjörnum samkvæmt lögum nr. 58/1961.

2. gr.

Hreppsnefnd Hafnarhrepps er almennt í fyrirsvari fyrir sveitarfélagið og skal engu máli er varðar sérstaklega hagsmuni hreppsins til lykta ráðið án umsagnar hreppsnefndar.

Hreppsnefnd ber að gæta hagsmuna hreppsins í hvívetna og annast þau viðfangsefni sem henni eru fengin að lögum og reglugerðum, svo og málefni sem henni eru fengin með samþykktum, er hún hefur sett eða á henni kunna að hvíla að öðru leyti.

Meginverkefni hreppsnefndar eru þessi:

A. Hún fer með yfirstjórn á fjárreiðum hreppsins.

1. Árlega ber hreppsnefnd að gera áætlun um tekjur og gjöld hreppsins fyrir hvert reikningsár (almanaksár) og eigi síðar en í febrúarmánuði. Í fjárhagsáætlun skal greina í meginatriðum hvernig fjárveitingu til einstakra stofnana og framkvæmda skuli hagað sbr. B. lið. Einnig skal tekið fram hvernig áætlaðar tekjur greinast.

2. Hún hefur í hendi yfirumsjón með fjárstjórn hreppsins og gætir þess að tekjur séu innheimtar og greiðslur inntar af hendi í samræmi við það sem ákveðið er í fjárhagsáætlun.  
Eigi má greiða fé úr sveitarsjóði nema heimild sé til þess í fjárhagsáætlun hreppsins og/eða hreppsstofnana eða með annarri ákvörðun hreppsnefndar.
  3. Hún hefur yfirumsjón með því að eignir hreppsins séu tryggilega varðveittar.
  4. Hún kveður á um lántökur fyrir hreppinn.
  5. Hún kveður á um ábyrgðir sveitarsjóðs.
  6. Hún skal hafa fullnaðarúrskurð á ársreikningum og eigi síðar en í júnímánuði ár hvert.
- B. Hreppsnefnd hefur yfirumsjón með verklegum framkvæmdum sveitarfélagsins. Í fjárhagsáætlun kveður hún á um hvernig verklegum framkvæmdum skuli hagað í meginatriðum á fjárhagsárinu. Hún getur gert heildaráætlun um framkvæmd tiltekinna verkefna svo og um einstök verkefni ef þurfa þykir og ástæða er til.
- C. Hreppsnefnd ræður eða kýs sveitarstjóra og kýs nefndir eftir því sem segir í reglugerð þessari eða öðrum samþykktum, svo og endurskoðendur reikninga sveitarfélagsins. Ennfremur ræður hún fasta starfsmenn hreppsins og ákveður laun þeirra.
- D. Hreppsnefnd setur reglur um stjórn hreppsmálefna og reglur um meðferð tiltekinna málefna hreppsins, ákveður gjaldskrár hreppsfiirtækja eftir því sem þörf krefur o. s. frv.

## II. KAFLI

### Fundarsköp hreppsnefndar.

#### 3. gr.

Á fyrsta fundi hreppsnefndar að afloknum sveitarstjórnarkosningum kýs hún sér oddvita og varaoddvita úr hópi hreppsnefndarmanna og fer um kosningu þeirra og starfstíma eftir gildandi sveitarstjórnarlögum.

Aldursforseti hreppsnefndar stýrir fyrsta fundi hennar þar til kjöri oddvita er lokið.

Ef oddviti eða varaoddviti er ekki viðstaddur á fundi hreppsnefndar skal aldursforseti gegna fundarstjórastörfum, nema hreppsnefnd ákveði að kjósa sérstakan fundarstjóra í það skipti.

Ef oddviti deyr eða varaoddviti, eða verður varanlega forfallaður frá störfum áður en kjörtímabil hans er á enda skal kjósa oddvita í hans stað, fyrir þann tíma sem eftir er af kjörtímabilinu.

#### 4. gr.

Oddviti stjórnar umræðum á fundi hreppsnefndar. Hann sér um að fundargerðir séu skipulega færðar í fundargerðarbók og allar tillögur og ályktanir séu réttar og nákvæmlega bókaðar, svo og hverja afgreiðslu þær hljóta.

Oddviti sér um að allt fari löglega og skipulega fram á fundum hreppsnefndar. Hann úrskurðar um skilning á fundarsköpum samkvæmt samþykkt þessari, en skjóta má úrskurði hans undir úrlausn hreppsnefndar.

#### 5. gr.

Hreppsnefnd ræður sérstakan fundarritara utan hreppsnefndar, sem sér um færslu gerðabókar og hefur oddviti eftirlit með því að rétt sé fært til bókar.

Í gerðabók skal skráð hvar og hvenær fundur sé haldinn, hverjir sitji fundinn, töluröð hreppsnefndarfunda svo og hver sé fundarritari og einnig það sem oddviti vill láta færa til bókar, þó ekki sé til getið í dagskrá fundarins.

Hver hreppsnefndarmaður sem ekki er sammála hinum á rétt á því að ágreiningsálit hans verði ritað með fáum orðum í gerðabókina.

Hreppsnefndarmenn skulu fá send afrit af fundargerðum fyrir næsta fund. Komi fram athugasemdir skulu þær teknar til greina og færðar til bókar. Hreppsnefndarmenn skulu undirrita allar fundargerðir í lok hvers fundar.

6. gr.

Hreppsnefnd heldur fundi að jafnaði tvisvar í mánuði nema í júlí og ágúst. Ákveða skal reglulega fundardaga og fundartíma við upphaf hvers kjörtímabils. Sveitarstjóri boðar fundi hreppsnefndar í samráði við oddvita.

Aukafundi skal ákveða ef 2 hreppsnefndarmenn hið fæsta krefjast þess.

7. gr.

Sveitarstjóri og oddviti semja dagskrá hreppsnefndarfunda. Á dagskrá skal taka:

1. Fundargerðir byggðaráðs og annarra lögmætra nefnda, sem þurfa staðfestingar hreppsnefndar á ályktunum sínum.
2. Hvert það mál sem fellur undir verksvið hreppsnefndar samkv. 2. gr. og sbr. 10. gr. laga nr. 58/1961 enda sé þess óskað af sveitarstjóra, byggðaráði, lögmætri nefnd eða hreppsnefndarmanni að málið sé tekið á dagskrá.
3. Lögmætar kosningar nefnda og starfsmanna svo og hvert það málefni annað, sem hreppsnefnd á að fjalla um að lögum. Sá sem óskar að fá mál tekið á dagskrá hreppsnefndar skal tilkynna það sveitarstjóra skriflega með tillögu um fyrirspurn eða stuttri greinargerð, eigi síðar en 4 dögum fyrir hreppsnefndarfund. Sveitarstjóri skal í síðasta lagi 2 dögum fyrir boðaðan hreppsnefndarfund, hafa sent öllum hreppsnefndarmönnum og a. m. k. 1 varamanni hvers lista, dagskrá næsta hreppsnefndarfundar. Í dagskránni skal tilgreina fundarstað og tíma, þær fundargerðir sem fyrir fundi liggja, tillögur sem fram hafa komið og gera í stuttu máli grein fyrir þeim málum öðrum sem um skal fjallað. Fylgja skal eftirrit fundargerða, tillagna, afrita af skýrslum og athugasemdir endurskoðenda svo og annarra gagna sem til upplýsinga geta orðið um málefni sem á dagskrá eru. Ef ákveðinn verður aukafundur samkv. 2. málsg. 6. gr. skal að jafnaði boðað til hans með dagskrá sem send verði hreppsnefndarmönnum og varahreppsnefndarmönnum með eins sólarhrings fyrirvara. Heimilt er þó að boða fund með styttri fyrirvara ef aðkallandi mál bíður afgreiðslu, enda sé þess getið með fundarboði hvaða mál sé á dagskrá. Mál skulu afgreidd í þeirri röð sem dagskrá segir. Þó er oddvita heimilt að víkja frá röð mála á dagskrá, enda fallist hreppsnefnd á breytinguna. Heimilt er að taka mál á dagskrá þó ekki sé þess getið í fundarboði, enda samþykki meirihluti hreppsnefndarmanna þau afbrigði.

8. gr.

Hreppsnefndarfundi skal auglýsa á sama hátt og venja er til um opinberar auglýsingar í hreppnum a. m. k. með 24 klst. fyrirvara.

9. gr.

Hreppsnefndarfundi skal halda í heyranda hljóði. Hreppsnefnd getur þó ákveðið að ræða einstök mál fyrir luktum dyrum t. d. einkamál manna, eða mál, sem æskilegt er vegna hagsmuna hreppsins að rædd séu fyrir luktum dyrum.

Ef tillaga kemur fram um það að mál skuli rætt fyrir luktum dyrum skal úr því skorið með atkvæðagreiðslu án umræðna.

Óheimilt er að skýra frá því, sem fram kemur við umræður fyrir luktum dyrum.

Ef áheyrandi á hreppsnefndarfundi raskar fundarfriði getur oddviti látið vísa honum út.

## 10. gr.

Hreppsnefnd getur enga bindandi ályktun gert nema meira en helmingur heppsnefndarmanna sé viðstaddur á fundi. Einfaldur meirihluti atkvæða ræður úrslitum mála nema annað sé sérstaklega áskilið í samþykkt þessari.

Sveitarstjóri og hver hreppsnefndarmaður getur borið fram breytingartillögu, viðaukattillögu, frestunartillögu eða frávisunartillögu við hvert það mál sem til umræðu er og hreppsnefnd á úrskurðarvald um. Skulu slíkar tillögur vera skriflegar.

Oddviti skal veita fundarmönnum ráðrúm til að semja tillögur á fundi ef þörf krefur. Þó skulu breytingartillögur við afgreiðslu mála sem samkv. samþykkt þessari þarf 2 umræður um hafa verið tilgreindar í dagskrá og afhentar sveitarstjóra skriflega sem um sérstaka tillögu væri að ræða sbr. 7. gr. Þó er heimilt að veita afbrigði í þessum eignum með meirihluta atkvæða.

Ef jafnmörg atkvæði eru með máli og móti fellur það nema við kosningu þá ræður hlutkesti.

Mál má afgreiða með því að samþykkja eða fella, vísa því frá með einfaldri eða rökstuddri dagskrá, vísa því til afgreiðslu sveitarstjóra, nefnda eða með því að fresta því.

Oddviti sker úr því hvernig atkvæðagreiðslu um tilhögun skal hagað.

## 11. gr.

Hreppsnefnd afgreiðir mál við eina umræðu nema hina árlegu fjárhagsáætlun, ársreikninga og reglugerðir sem hljóta skulu staðfestingu ráðherra.

Um þessi mál skulu fara fram tvær umræður og líða ein vika hið skemmsta milli umræðna.

## 12. gr.

Atkvæðagreiðsla fer þannig fram, að hreppsnefndarmaður réttir upp hönd. Nafnakall eða skrifleg atkvæðagreiðsla skal viðhöfð ef oddviti ákveður, sveitarstjóri óskar eða tveir hreppsnefndarmenn hið fæsta.

Við nafnakall er hreppsnefndarmanni skylt að greiða atkvæði nema hann færi rök fyrir undanfærslu sinni er oddviti metur gild. Ef hreppsnefndarmaður vill ekki una úrskurði oddvita má hann skjóta úrskurðinum til hreppsnefndar sem sker úr án umræðna.

## 13. gr.

Hver hreppsnefndarmaður sem vill taka til máls á hreppsnefndarfundi, skal óska heimildar oddvita.

Að jafnaði skulu hreppsnefndarmenn taka til máls í þeirri röð sem þeir hafa kvatt sér hljóðs. Heimilt er að víkja frá þessu ef um er að ræða sveitarstjóra eða framsögumann svo og hreppsnefndarmann sem gera vill stutta athugasemd eða leiðréttu ummæli um sjálfan sig.

Ef tveir eða fleiri hafa kvatt sér hljóðs samtímis, ákveður oddviti í hvaða röð þeir tala.

Oddviti getur heimilað, ef 4 hreppsnefndarmenn samþykkja að maður utan hreppsnefndar megi tala á hreppsnefndarfundum, en skylt skal honum þá að gæta í hvívetna fundarskapa.

## 14. gr.

Sveitarstjóri sem ekki er jafnframt hreppsnefndarmaður, skal hafa málfrelsi á hreppsnefndarfundum til jafns við hreppsnefndarmenn.

Hreppsnefndarmaður skal beina máli sínu til oddvita.

Ekki má lesa prentað mál nema með leyfi oddvita.

## 15. gr.

Ef oddviti telur umræður dragast úr hófi fram getur hann lagt til að umræðutími hvers hreppsnefndarmanns megi ekki fara fram úr ákveðinni tímalengd eða umræðum hætt.

Þá getur oddviti hvenær sem er lagt til að umræðum skuli lokið á ákveðnum tíma.

Hreppsnefnd afgreiðir tillögur oddvita sbr. 1. og 2. mgr. umræðulaust.

Hver hreppsnefndarmaður getur borið fram slíka tillögu og skal hún einnig afgreidd umræðulaust.

Ákvæði um takmörkun á ræðutíma eiga ekki við þegar fjallað er um frumvarp að fjárhagsáætlun.

## 16. gr.

Skylt er hreppsnefndarmanni að lúta valdi oddvita í hvívetna er að því lýtur að gætt sé góðrar reglu.

Ef hreppsnefndarmaður ber aðra menn brigslum eða vikur verulega frá umræðuefninu skal oddviti víta hann. Ef hreppsnefndarmaður er víttur tvisvar á sama fundi getur oddviti lagt til við hreppsnefnd að hann verði sviptur málfrelsi það sem eftir er fundar. Skal sú tillaga afgreidd umræðulaust.

Ef hreppsnefndarmaður hlýðnast ekki úrskurði hreppsnefndar eða almenn óregla kemur upp á fundi skal oddviti gera hlé um stundarsakir eða ef nauðsyn krefur fresta eða slíta fundi.

## III. KAFLI

**Réttindi og skyldur hreppsnefndarmanna.**

## 17. gr.

Hverjum hreppsnefndarmanni er skylt að sækja fundi hreppsnefndar nema lögmæt forföll hamli.

Honum er skylt að taka að sér störf sem hreppsnefnd felur honum s. s. oddvitastörf, setu í byggðaráði eða öðrum nefndum.

Sá sem hefur verið oddviti hreppsnefndar, setið í byggðaráði eða öðrum nefndum getur þó skorast undan kosningu jafnlangan tíma og hann hefur haft starfið á hendi.

Hreppsnefndarmönnum er skylt að koma þrúðmannlega fram á hreppsnefndarfundum og gæta þagnarskyldu um einkamál og hagi einstaklinga og félaga, sem þeir kynnu að fá vitneskju um sem hreppsnefndarmenn.

Þá er þeim skylt að gæta hagsmuna og velferðar hreppsins út á við sem inn á við, eftir sinni bestu getu, vinna og stuðla að friðsamlegri lausn deilumála, sem upp kunna að koma milli hreppsnefndarmanna.

## 18. gr.

Hreppsnefndarmönnum er heimilt að kynna sér bækur, skjöl og bréf hreppsins og stofnana hans.

## 19. gr.

Hver hreppsnefndarmaður á rétt á tiltekinni þóknun fyrir störf sín í hreppsnefnd skv. ákvörðun hennar.

## 20. gr.

Ef hreppsnefndarmaður, kosinn í nefnd og til annarra starfa, forfallast um stundarsakir vegna veikinda eða af öðrum ástæðum, á hann rétt á að tilnefna mann af sama lista og hann var kjörinn til, til að taka sæti hans á meðan, enda hafi varamaður ekki verið kosinn.

Hafi hann engan tilnefnt fer um varamann skv. 2. og 3. mgr. 20. gr. sveitarstjórnarlaga.

## 21. gr.

Hreppsnefnd getur veitt hreppsnefndarmanni, sem óskar, lausn frá hreppsnefndarmannsstarfi.

## IV. KAFLI

**Byggðaráð.****Reglur byggðaráðs Hafnarhrepps.**

## 22. gr.

Byggðaráð skal skipað þrem hreppsnefndarmönnum og jafnmörgum til vara og skulu þeir kosnir hlutfallskosningu. Kjörtímabil byggðaráðs er 1 ár.

Forfallist byggðaráðsmaður, eða hans missir við, tekur sæti hans varamaður á sama lista, sem aðalmaður. Séu bæði aðalmaður og varamaður forfallaðir geta flokkarnir látið fulltrúa sína eða varafulltrúa mæta í þeirra stað.

Byggðaráð getur leyft að flokkur sem fulltrúa á í hreppsnefnd, en ekki fulltrúa í byggðaráði, megi tilnefna fulltrúa til að sitja fundi byggðaráðs með málfrelsi og tillögurétt.

## 23. gr.

Sveitarstjóri á sæti í byggðaráði, og má kjósa hann formann þess enda hefur hann þar málfrelsi og tillögurétt, en atkvæðisrétt, því aðeins að hann sé hreppsnefndarfulltrúi og kosinn í byggðaráð.

Byggðaráð kys sér formann og ritara. Sá er rétt kjörinn sem fær meirihluta atkvæða. Ef tveir fá jöfn atkvæði ræður hlutkesti.

Byggðaráð getur ráðið fundarritara utan byggðaráðs.

## 24. gr.

Byggðaráð heldur fundi eftir þörfum. Fundir eru lögmætir ef 2 byggðaráðsmenn mæta.

## 25. gr.

Byggðaráð fer ásamt sveitarstjóra með framkvæmdastjórn málefna Hafnarhrepps, að því leyti sem hún er ekki fengin öðrum samkvæmt lögum, reglugerðum eða sérstökum samþykktum hreppsnefndar.

Í þeim tilvikum að sérstökum nefndum hreppsnefndar sé falið að hafa sérstaka málaflokka með höndum skal byggðaráð fjalla um fjárhagshlið málanna.

## 26. gr.

Byggðaráð hefur eftirtalin mál með höndum, stjórnar þeim og tekur um þau ákvarðanir, sem jafnframt eru tillögur til hreppsnefndar og þurfa að öðlast samþykki hennar svo gild verði. Þó er byggðaráði heimil fullnaðarákvörðun mála, sem ekki eru veruleg fjárhagsatriði, enda sé eigi ágreiningur í byggðaráði né við sveitarstjóra um slíkar ákvarðanir.

A. Fjármál: Til þeirra teljast umsjón og stjórn á fjárhag hreppsins, undirbúningur og samning fjárhagsáætlunar, tillögur til úrskurðar á reikningum hreppsins, eftirlit og fyrirkomulag á bókhaldi og innheimtu gjalda.

Byggðaráð ákveður hvernig varið skuli fé því sem ætlað er til verklegra framkvæmda að því leyti sem slíkt er ekki tekið fram í fjárhagsáætlun.

B. Vegamál: Byggðaráð hefur stjórn og umsjón með vegamálum hreppsins, götum, holræsum, vatnsveitu, vatnssölu og götulýsingu, allt eftir nánari ákvörðun sveitarstjóra og reglugerðum þar að lútandi.

- C. Fasteignamál: Til þeirra telst umsjón með fasteignum hreppsins, svo sem húseignum o. fl., að því leyti, sem ekki er öðruvísi fyrirskipað um þessi mál í lögum og reglugerðum.
- D. Framfærslumál: Byggðaráð hefur með höndum stjórn allra framfærslumála Hafnarhrepps. Undir það heyra barnaleikvellir og dagheimili. Sveitarstjóri er framfærslustjóri, nema til þess sé ráðinn sérstakur maður.
- E. Önnur mál: Öll önnur mál sem ekki eru falin sérstökum nefndum í samþykktum um stjórn hreppsmála eða með sérstakri samykkt hreppsnefndar skulu heyra undir byggðaráð. Auk þess getur hreppsnefnd vísað þeim málum sem henni sýnist til byggðaráðs, þegar þurfa þykir, þó þau heyri ekki sérstaklega undir það.

## 27. gr.

Skylt er starfsmönnum hreppsins að sitja fundi byggðaráðs þegar til umræðu eru málefni, sem störf þeirra snerta og þess er óskað.

## V. KAFLI

## Um sveitarstjóra.

## 28. gr.

Hreppsnefnd ræður sveitarstjóra. Ráðningartími hans skal að jafnaði vera hinn sami og kjörtímabil hreppsnefndar. Heimilt er þó að ráða sveitarstjóra til lengri tíma.

Ráðningasamningur er þó uppsegjanlegur af beggja hálfu með sex mánaða fyrirvara. Á ráðningarkjörtímabilinu þarf uppsögn ráðningarsamnings tvær umræður í hreppsnefnd. Líða skulu minnst 24 klst. milli umræðna.

## 29. gr.

Sveitarstjóri hefur framkvæmd ákvarðana þeirra, sem hreppsnefnd gerir, og framkvæmd á málefnum hreppsins yfirleitt að því leyti, sem hreppsnefnd hefur ekki ákveðið annað um tiltekið mál.

Skylt er sveitarstjóra að hafa ákveðinn daglegan viðtalstíma og sé hann auglýstur á skrifstofu hreppsins.

## 30. gr.

Sveitarstjóri á sæti á fundum hreppsnefndar og byggðaráðs og hefur þar sömu réttindi og skyldur sem hreppsnefndarmenn, nema annað sé sérstaklega tekið fram í þessari samþykkt. Hann á einnig sæti í fastanefndum.

EKKI hefur hann atkvæðisrétt í hreppsnefnd, byggðaráði eða fastanefndum nema hann sé til þess kjörinn.

Hann hefur óbundið málfrelsi og tillögurétt á fundum hreppsnefndar, byggðaráðs og nefnda.

## 31. gr.

Útgjöld sem ekki eru lögbundin, samningsbundin eða leiða af fyrri samþykkt hreppsnefndar má ekki greiða nema til komi samþykkt hreppsnefndar.

Ekkert gjald má greiða úr hreppssjóði nema sveitarstjóri ávísi því til greiðslu eða einhver sá, sem fengið hefur umboð byggðaráðs til slíks.

## 32. gr.

Nú samþykkir hreppsnefnd ályktun sem hefur verulegan kostnað í för með sér, sem ekki hefur verið gert ráð fyrir í gildandi fjárhagsáætlun og án þess að gera jafnframt fullnægjandi ráðstafanir til að standast þennan kostnað og getur sveitarstjóri fellt slíka ályktun úr gildi um sinn og óskað eftir endurskoðun hreppsnefndar á samþykktinni.

## 33. gr.

Sveitarstjóra er heimilt í samráði við byggðaráð að fela öðrum að gegna störfum sínum um skemmri tíma.

Stendur sú ákvörðun óhöggud nema byggðaráð ákveði aðra tilhögun. Ef um lengri forföll en tvo mánuði er að ræða skal hreppsnefnd setja mann til að gegna starfi hans.

## VI. KAFLI

**Endurskoðendur.**

## 34. gr.

Hreppsnefnd kýs endurskoðendur til eins árs í senn til að endurskoða reikninga hreppsins og fyrirtækja hans. Hreppsnefndarmenn eru ekki kjörgengir til endurskoðunarstarfa.

Um framkvæmd endurskoðunar fer eftir ákvæðum d-liðar 3. kafla laga nr. 58/1961.

Lokið skal endurskoðun eigi síðar en 30. apríl ár hvert.

Kjörnir endurskoðendur eiga rétt á þóknun fyrir starf sitt eftir ákvörðun hreppsnefndar.

## 35. gr.

Byggðaráði er heimilt að fela löggiltum endurskoðanda endurskoðun reikninga hreppsins og fyrirtækja hans sbr. 26. gr. A. lið.

Senda skal hann byggðaráði skýrslu um niðurstöður sínar áður en byggðaráð gerir tillögu um afgreiðslu ársreikninga til hreppsnefndar.

## VII. KAFLI

**Nefndir.**

## 36. gr.

Hreppsnefnd kýs hlutfallskosningu eftirtaldar nefndir og starfsmenn til að fara með tiltekin mál eftir því sem lög mæla fyrir og samkvæmt sérstakri samþykkt hreppsnefndar.

**Til eins árs í júní ár hvert:**

1. Þrjú menn í byggðaráð og þrjú til vara.
2. Kjörstjórn samkvæmt lögum.
3. Tvo endurskoðendur hreppsreikninga og tvo til vara.
4. Fulltrúa og varafulltrúa á þing SSA samkv. samþ. samtakanna.

**Til fjögurra ára að afloknum hreppsnefndarkosningum.**

1. Fimm menn í hafnarnefnd og fimm til vara.
2. Fimm menn í skólanefnd grunnskóla og fimm til vara.
3. Fimm menn í skipulagsnefnd og fimm til vara.
4. Fimm menn í byggingarnefnd og fimm til vara.
5. Sjö menn í atvinnumálanefnd og sjö til vara.
6. Þrjú menn í veitunefnd og þrjú til vara.
7. Þrjú menn í barnaverndarnefnd og þrjú til vara.
8. Tvo menn í bókasafnsnefnd og tvo til vara.



9. Tvo menn í áfengisvarnanefnd og tvo til vara.
10. Þrjá menn í heilbrigðisnefnd og þrjá til vara.
11. Tvo menn í húsnefnd Sindrabæjar og tvo til vara.
12. Einn mann til brunabótavirðingar og einn til vara.
13. Tvo menn í forðagæslunefnd o. fl. og tvo til vara.
14. Þrjá menn í rekstrarnefnd dagheimilis og þrjá til vara.
15. Þrjá menn í launanefnd og þrjá til vara.
16. Fimm menn í umhverfisnefnd og fimm til vara.
17. Fimm menn í félagsmálanefnd og fimm til vara.
18. Þrjá menn í stjórn verkamannabústaða og þrjá til vara.
19. Tvo menn í stjórn tónskóla A-Skaft. og tvo til vara.
20. Þrjá menn í umferðarnefnd og þrjá til vara.
21. Þrjá menn í menningarmálanefnd og þrjá til vara.
22. Þrjá menn í rekstrarnefnd íþróttahúss og þrjá til vara.
23. Tvo fulltrúa á landsþing Sambands ísl. sveitarfélaga og einn til vara.

### 37. gr.

Um skipan nefnda, valdsvið þeirra og verksvið, fer eftir því sem ákveðið er í lögum eða samþykkt hreppsnefndar. Þar sem ekki er um slíkar reglur að ræða getur hreppsnefnd sett þær.

Ekki má framselja nefnd vald, sem hreppsnefnd er fengið að lögum. Þegar kjörtími nefndar er óákveðinn, skal litið svo á að umboð nefndarinnar falli niður, þegar kjörtími hreppsnefndar er á enda, nema um sé að ræða nefnd, sem fengið hefur til úrlausnar ákveðið og afmarkað verkefni. Þá skal litið svo á að starfi hennar ljúki fyrst er verkefnið er til lykta leitt.

### 38. gr.

Nú andast maður, sem kosinn hefur verið í nefnd, flyst á brott eða forfallast varanlega á annan hátt, og skal þá kjósa annan mann í hans stað það sem eftir er kjörtímans. Skylt er að gefa þeim flokki eða flokkum sem kusu hinn forfallaða mann af lista við hlutfallskosningar kost á að tilnefna eftirmanninn.

Þetta á þó ekki við um hreppsnefndarmann þegar varahreppsnefndarmanni ber að taka sæti hans.

## VIII. KAFLI

### Um starfsmenn hreppsins.

### 39. gr.

Hreppsnefnd ræður fasta starfsmenn hreppsins og veitir þeim lausn, eftir því sem segir í samþykkt þessari, nema vald til þess sé að lögum fengið öðrum aðilum, eða á annan hátt mælt fyrir um sérmál tiltekinna stofnana. Fastir starfsmenn hreppsins teljast þeir einir, sem ráðnir eru í störf samkv. 1. mgr. og taka laun samkvæmt launasamþykkt hreppsins eða launasamningi sem hreppsnefnd hefur samþykkt.

Hreppsnefnd ákveður hvort auglýsa skuli til umsóknar stöður hjá hreppnum og fyrirtækjum hans, en sveitarstjóri ákveður slíkar auglýsingar að öðru leyti, þar á meðal hvernig auglýsa skuli.

Hreppsnefnd getur ákveðið hver almenn skilyrði skulu gilda um ráðningu í stöðu hjá hreppnum, svo og sérskilyrði, sem gilda skuli um ákveðnar stöður.

Sá sem hlotið hefur fasta ráðningu í stöðu á rétt á að halda henni meðan hann rækir stöðuna þannig að ekki verði að fundið.

Hreppsnefnd getur sett starfsmönnum erindisbréf og kveðið þar á um starfssvið þeirra.

Skylt er starfsmönnum að hlíta breytingu á starfssviði sínu enda missi þeir ekkert af launum sínum við það.

Samþykkt þessi sem samin er og samþykkt af hreppsnefnd Hafnarhrepps í Austur-Skaftafellssýslu staðfestist hér með samkvæmt 30. gr. sveitarstjórnarlaga nr. 58/1961 til þess að öðlast gildi þegar í stað.

*Félagsmálaráðuneytið, 19. maí 1983.*

F. h. r.

**Hallgrímur Dalberg.**

*Hólmfríður Snæbjörnsdóttir.*

## REGLUGERÐ

**um breyting á reglugerð nr. 486/1982 um söluskatt, sbr. reglugerð nr. 585/1982**

**um breyting á henni.**

1. gr.

3. mgr. 7. tl. 10. gr. reglugerðarinnar orðist svo:

Til skemmtistarfsemi teljast hvers konar samkomur fólks þar sem aðgangseyrir er greiddur, annað hvort við inngang eða sem hluti af félagsgjaldi, sbr. þó 24. tl. 14. gr. Skiptir ekki máli þótt samkomur þessar séu ekki opnar almenningi. Um innheimtu söluskatts af skemmtanastarfsemi vísast til 2. tl. 33. gr.

2. gr.

1. mgr. 14. tl. 13. gr. reglugerðarinnar, sbr. 1. gr. reglugerðar nr. 585/1982, orðist svo:

Sala á fasteignum, skipum, flugvélum og svifflugum. Sala á svifdrekum, með eða án vélar, er þó söluskattsskyld.

3. gr.

24. tl. 14. gr. reglugerðarinnar orðist svo:

Aðgangseyrir að leiksýningum, tónleikum, upplestri og fyrirlestrahaldi enda séu skemmtanir þessar ekki í neinum tengslum við annað skemmtana- og samkomuhald, svo og að sýningum á íslenskum kvikmyndum.

4. gr.

Reglugerð þessi, sem sett er samkvæmt heimild í 20. gr. laga nr. 10/1960 um söluskatt með áorðnum breytingum, öðlast gildi þegar í stað.

*Fjármálaráðuneytið, 13. maí 1983.*

**Ragnar Arnalds.**

*Árni Kolbeinsson.*